

Beatrice deducta foret, nascens regnum corruisset. Quid quod Salucienſes Proceres hinc prognatos invenimus. Ricciarda in exilio nata, Thomæ Salucienſis in matrimonium data fuit, unde hinc potentia, & perpetuum nomen patrum memoriâ. Ricciarda altera, Philippo Maria procurante in Eſtenſem domum per legitimas nuptias reverſa, ex Nicolao mares duos peperit, Herculem, qui nunc regnat, & Sigismundum. Per hæc tempora Genuenſes civilibus malis fatigati, & rerum feſſi, ut ſub alienigena Principe irarum, & malorum civilium finis daretur, neque per ſimultatem, & invidiam civilibus armis perpetuò agitantur, Aetio Vicecomiti publico conſenſu Genuam regendam tradiderunt, & niſi mors interceſſiſſet, in dominium, & poſteſtatem Vicecomitis Ligur veniſſet. Mortuo Aetio urbs diſcors, & interſinis armis penè exhausta, novum magiſtratum ſine provocacione conſtituit. Proditum eſt in Annalibus, quom Populus in concionem vocatus eſſet, & tœdio civilium diſſenſionum de tranquillitate, & ocio Urbis conſultaret, in tumultu jaſtatam vocem Ducem, exemplo Venetorum, conſtitui oportere. Excepta vox fuit, conſenſu omnium Symon Buccanigra Dux creatur. Hujus pater & avus Præſecturam Populi ſub ridicula appellatione tenuerant. Invaſit deinde conſuetudo, ut ex plebe dumtaxat Gibellina Reipublicæ princeps crearetur. Ita dimiſſis veterum

A factionum ſtudiis in novam ſectam Populus abiit, neque deinceps de principatu primores Populi decertarunt. Ceterum Aetius, ut Ludovici Bavarorum Ducis ferociam rerunderet, ſimulque, ut opinione Pontificis Populus reverentior, & magis fidelis redderetur, Benedicto XII. ſe dedititum profeſſus eſt. Ea res gratiam cum Pontifice reconciliavit, urbes, & populos ſui ſtudioſiores fecit. Moritur hoc eodem anno Aycardus titulo tenus Archiepiſcopus, ut ſupra docuimus; nam repugnante Matthæo & filiis, niſi ſub conditione Sacerdotio potiri non potuit. Joannes, cui cura Sacrorum delegata erat, illi ſufficitur; erat enim Novarienſis ſacri Præſectus. Aycardus honorifico funere elatus in æde Minorum ſepultus eſt. Rebus in hunc modum compoſitis Aetius poſtridie Idus Auguſti, ut quidam tradunt, functus naturæ ſatiſfecit. Sepultus in æde, quam intra parietes regiæ conſtruxerat. Ea deinde Gothardi appellationem habuit, ad quam uſque noſtra in tempora tertio Nonas Maji, viri atque matronæ frequentes concurrunt, votaſque perſolvunt, quia Gothardo favente a morbo liberantur, quem nulla medicina tollere poteſt. Prior appellatio ædis ſub Virgine Maria, & Joanne Baptiſta. Vota repetens Aetius Gothardi nomen indidit, ab his credo perſuaſus, qui conſolato morbo nullam opem, niſi a Deo expoſcendam dixeret.

Explicit Liber Quartus.